

欽
定
全
唐
文

欽定全唐文卷八目錄

太宗五

征遼還宴賜父老詔

令皇太子斷決機務詔

修晉書詔

平薛延陀幸靈州詔

令天下諸州舉人手詔

答元奘法師進西域記書詔

賜功臣葬地詔

平契苾幸靈州詔

貶蕭瑀手詔

絕高麗朝貢詔

令皇太子處分庶務詔

答長孫無忌等請封禪詔

允行封禪詔

求直言手詔

封禪詔

左邱明等二十一人配享孔子廟詔

贖取陷沒蕃內人口詔

建玉華宮手詔

停封禪詔

伐龜茲詔

賜高士廉陪葬詔

玉華宮成曲赦宜君縣詔

賜蕭瑀陪葬詔

賜房元齡陪葬詔

諸州寺度僧詔

金史卷之二十一
答長孫無忌請誅段志冲手詔

降雍州見禁囚徒詔

甘雨降大赦詔

賜李靖陪葬詔

宣慰劔南將士詔

欽定全唐文卷八

太宗五

征遼還宴賜父老詔

太原之地興運所階全晉之人義深惟舊自朕恭膺寶厯
二紀於茲何嘗不御展長懷想峻陵之風雨臨軒遠感念
大麓之雲雷當於此時乃忘身而拯溺實賴同德並贏糧
而樂推役不踰年遂清區域諒繇成都之衆謳訟闡虞帝
之功戰牧之徒歌舞興周王之業仗茲協力竟至升平懷
彼勤勞何忘晷刻旣因垂拱之暇再省創業之方周厯郊

原宛如疇昔訪其父老已多長謝不見所識魏后遂以興
嗟恤彼故人漢皇因而式宴前王是日哀樂交懷在朕深
衷義符於此是用具陳廣樂共申高宴取譬還譙之賞同
彼幸代之情仍曲赦并州管内大辟已下繫囚見徒皆赦
除之常赦所不免者不在赦例

令皇太子斷決機務詔

朕粵自眇年時逢道喪懷生之類盡塗原野是用痛心疾
首攘袂救焚以戰場爲俎豆以干戈爲章服夕不遑息寧
濟四方饑不及餐推移一紀幸賴上元幽贊下土宅心承

天嗣厯勵精求政蠲百王之積弊振千祀之頽綱旰食宵衣百齡行半洎乎至道方泰荼蓼遽侵自十九年以來亟罹哀恤又屬高麗逆亂毒被韓夷微物不安無忘隱惻遂復躬行弔伐遠涉遐荒時厯暄寒體親風雨雖復澄氛海外有慰深衷久倦征途乃多虛弊方今兆庶殷阜六合廓清垂拱無爲允在茲日而皇太子治令德遠彰所有機務可令斷決百辟卿士咸宜受其節度朕當親調五藥暫屏萬機三數月閒且自怡攝

修晉書詔

朕拯溺師旋省方禮畢四海無事百揆多閒遂因暇日詳
觀典府考龜文於羲載辨鳥冊於軒年不出巖廊神交千
祀之外穆然旒纁臨睨九皇之表是知右史序言繇斯不
昧左官詮事厯茲未遠發揮文字之本導達書契之源大
矣哉蓋史籍之爲用也自沮誦攝官之後伯陽載筆之前
易代史臣皆有刪著仲尼修而採檣杞倚相誦而闡邱墳
降自西班馬騰其茂實逮於東漢范謝振其芳聲萇爾
當塗陳壽敷其國志眇哉有宋沈約裁其帝籍至若梁陳
高氏朕命勒成惟周及隋亦同甄錄莫不彰善癉惡振一

代之清芬襲德懲凶備百王之令典惟晉氏膺運制有中
原上帝啟元石之圖下武代黃星之德及中朝鼎謝江右
嗣興並宅寰區累重徽號足以飛英麗筆將美方書但十
有八家雖存記注而才非良史書虧實錄榮緒煩而寡要
行思勞而少功叔寧課虛滋味同於畫餅子雲學海涓滴
堙於涸流處叔不預於中興法盛莫通於創業洎乎干陸
曹鄧略紀帝王鸞盛廣松纔編載記其文旣野其事罕傳
遂使典午清塵韞遺芳於簡策金行曩誌闕繼美於驪駟
遐想寂寥深爲歎息宜令修國史所更撰晉書詮次舊文

金史卷五
裁成義類俾夫湮落之誥咸使發明其所須可依修五代
史故事若少學士亦量事追取

平薛延陀幸靈州詔

朕聞獠獫強暴歷代憑陵結晦關都凝氛大漠家山宅野
時獸聚而禽分幕毳廬氊乍蠡屯而蟻集退因利飽進爲
財饑前王弊其貪殘中夏憚其荐食然而三策短慮非爲
禦寇之方千里長城豈謂靜邊之計故以百王靡服千古
不賓種落實繁奸回孔熾武德之際飲馬渭濱貞觀之初
敢恣凌逼朕載懷慷慨命將出師旗鼓一臨沙漠大定雪

涇陽之周恥報白登之漢讎截瀚海以開池籠天山而築苑其餘醜類自己羈縻勞我邊氓軫余遐念將奮鉞受命上元延陀惡積禍盈今日夷滅醜徒內潰凶黨外離契苾送款來降其餘相率歸附惟僕骨同羅猶懷假息冰消雹碎匪夕伊朝豈朕威德所懷故乃蒼旻之惠觀賊此勢何能自全今不乘機恐貽後悔故欲暫往靈州親自招撫安邊靜亂下固毗基一軌同文永宏家業使萬里之外不有半烽百郡之中猶無一戍永絕鎮防之役豈非黎元樂見雖復去歲東征士馬勞倦甫旋京邑曾未踰年今秋復

行理多疲頓但以良藥苦口非病者甘焉而必飲之思去膏肓之疾私種弊力豈農夫樂焉而必履之求其倉庫之益斯皆忍小惡而成大美就輕害而得殊功朕積疾累時今尚虛憊必欲牽疴就路以赴天機百辟士庶幸勿辭也遼東從兵皆不差發布告天下悉朕意焉

令天下諸州舉人手詔

高明之天資星辰以麗象博厚之地藉川嶽而成形況於帝王體元立極臨馭萬物字養生靈者乎所以致治之君遠讒佞近忠良屈己以伸人故能成其化爲亂之主親不

肖䟽賢臣虐下以恣情用能成其亂明君遵彼以興國暗
主行此以亡身是以馭朽臨冰銘心自戒宵興盱食側席
思賢庶欲博訪邱園搜採英俊弼我王道臻於大化焉可
令天下諸州明揚側陋所部之內不限吏人其有服道棲
仁澄心礪操出片言而標物範備百行以綜人師質高視
於琳琅人不聞於曾閔潔志邱園揚名里閭或甄明政術
曉達公方稟木鐸於孔門受金科於鄭相奇謀閒發明略
可以佐時識鑒清通偉才長於幹國或含章傑出命世挺
生麗藻適文馳楚澤而方駕鉤深覩奧振梁苑以先鳴業

擅專門詞高載筆或辨雕春園談瑩秋天發研機於一言
起飛電於三寸蓄斯奔箭未遂揚庭並宜推擇咸同舉薦
以禮將送具狀表聞限以今冬並與考使同赴庶使焚林
之舉咸矯翼於巖廊尺木之階方振鱗於遊霧翹心俊乂
稱朕意焉

答元奘法師進西域記書詔

省書具悉來意法師夙標高行早出塵寰泛寶舟而登彼
岸搜妙道而闢法門宏闡大猷蕩滌衆罪是故慈雲欲卷
舒之而蔭四空慧日將昏朗之而照八極舒朗之者其唯

法師乎朕學淺心拙在物猶迷況佛教幽微豈能仰測請
爲經題非己所聞新撰西域記者當自披覽

賜功臣葬地詔

周室姬公陪於畢陌漢庭蕭相附彼高園寵錫墳塋聞諸
上代從窆陵邑信有舊章蓋以懿戚宗親類同本之枝幹
元功上宰猶在身之股肱哀榮之義實隆始終之契斯允
今宜聿遵故實取譬拱辰庶在鳥耘之地無虧魚水之道
宜令所司於昭陵南左右廂封境取地仍即標誌疆域擬
爲葬所以賜功臣其有父祖陪陵子孫欲來從葬者亦宜

聽允

平契苾幸靈州詔

朕勞形育物盡敬承天蠢動不安櫛風而罔倦荒隅未靜
救焚而靡息獨運方寸貫徹上元凝想冕旒化行戎狄是
知惟天爲大合其德者弗違謂地蓋厚體其仁者光被故
能彌綸八極輿蓋兩儀振絕代之英聲畢天下之能事彼
匈奴者與開闢以俱生奄有龍庭共上皇而並列僭稱驕
子分天街於紫宸仰應旄頭抗大禮於皇極公犯帝座流
殃構禍乃於運初憑陵障塞連年壓境射雕馳騎亟飲灞

川逐鹿騰氛頻驚渭汭貽先皇之動色俾黎庶之塗原社稷爲虞軫情何已自朕御天下二紀於茲曩者聊命偏師遂擒頡利今茲始宏廟略已滅延陀雖則麾駕出征未踰郊甸前驅所轡纔掩塞垣長策風行已振金微之表揚威電發遠讐沙場之外遂使鴈山之北無復單于龍燭之南大開封域其契苾車必俟斤及鐵勒諸姓迴紇胡祿俟利發等總統百餘萬戶散出北漠遠遣使人委身內屬請同編列並爲州郡引領翹足暴十日而行油雲延首求哀沈九泉而請營魄朕當暫幸靈州親撫歸附宏茲肆赦加以

施生頒惠天隅曜威雲朔收其瀚海盡入提封解其辮髮
並垂冠帶混元以降殊未前聞無疆之業永貽來裔古人
所不能致今既吞之前王所不能屈今咸滅之斯實書契
所未有古今之壯觀豈朕一人獨能宣力蓋繇上靈儲祉
錫以太康宗廟威靈成茲克定即宜備禮告於清廟仍以
大慶頒示普天俾與黎元同茲有賴

貶蕭瑀手詔

朕聞物之順也雖異質而成功事之違也亦同形而罕用
是以舟浮楫舉可濟千里之川轅引輪停不越一毫之地

故知動靜相循易爲務曲直相反難爲功況乎上下之宜
君臣之際者矣朕以無明於元首期託德於股肱思欲去
僞歸真除澆反樸至於佛教非意所遵雖有國之常經固
弊俗之虛術何則求其道者未驗福於將來修其教者翻
受辜於既往至若梁武窮心於釋氏簡文銳意於沙門傾
帑藏以給僧祇殫人力以供塔廟及乎三淮沸浪五嶺騰
烟假餘息於熊蹯引殘魂於雀鷲子孫覆亡而不暇社稷
俄頃而爲墟報施之徵何其繆也而太子太保宋國公瑀
踐覆車之餘軌襲亡國之遺風棄公就私未明隱顯之際

身俗口道莫辨邪正之心修累葉之殃源祈一躬之福本
上以違忤君主下則扇習浮華往前朕謂張亮云卿既事
佛何不出家瑀乃端然自應請先入道朕即許之尋復不
用一迴一惑在於瞬息之間自可自否變於帷展之所乖
棟梁之大體豈具瞻之量乎朕猶隱忍至今瑀尚全無悛
改宜即去茲朝闕出牧小藩可商州刺史仍除其封

絕高麗朝貢詔

高麗餘燼謂能悔禍故遣停兵全其巢穴而兇頑成性殊
未革心前後表聞類多不實每懷詭誑罪極難宥見朕使

人又虧蕃禮所令每云莫擾新羅口云從命侵凌不止積其姦惡嘗包禍心蓋天攸棄豈宜馴養自今已後勿聽朝貢

令皇太子處分庶務詔

朕因東行憂勞幸靈州綏撫冒寒來往稍覺疲弊今欲至歲暮以來怡攝宜暫簡靜其祭祀及諸方表疏蕃客兵馬宿衛應行魚契給驛授五品以上官及五品以下官降解斷死罪等事依常式奏聞自餘並取皇太子治處分

答長孫無忌等請封禪詔

金史卷之五
九
朕念遠役初寧頗須休息深知所請甚合機宜即事省方
恐生勞擾俟百姓閒逸可徐議之

允行封禪詔

朕遐觀哲王煥在方冊功既成矣咸禮備以升中道既行
焉必奉符而告禪所以發揮天命昭報上靈其有建顯號
以創鴻徽施尊名而騰茂烈者莫不揚輝於鏤玉絢景於
塗金昭昭然麗三辰而並運滔滔焉播四溟而極深朕誠
寡德良深景慕曩者氓俗凋弊國步甫安勉致隆平日不
暇給而槐卿守闕請繼美於云亭嶽牧叩閭祈踵武於梁

岱自惟菲薄至道未凝抗禮卑穹實懷疑懼緬尋幼齒運
鍾交喪忘其家以徇天下委其體以濟寰中翊戴先皇削
平諸夏出於萬死首導五橫之源不顧一身先錫兆人之
命越自鑪炭獲返營魂拔於鬼錄並登仁壽竊惟天地之
大德存於施生朕以徑寸之小心襲於造育降斯休泰諒
或繇茲不然者何能致於此也遂得池隍象浦苑囿龍沙
置一候於鵜林同六爻於鰈水實資天睠賁以咸亨豈朕
微庸而能及此今茲列辟卿士鴻生碩儒各述靈徵累陳
丹款既迫羣議當事敬從

求直言手詔

朕聞堯舜之君自愚而益智桀紂之主獨智以添愚故異
順逆於忠言則殊榮辱於帝道朕登躡宇宙字育黔黎恐
大德之或虧懼小瑕之有累候忠良之獻替想英傑之謀
猷而諫鼓空懸逆耳之言罕進謗木徒設悸心之論無聞
唯昔魏徵每顯余過自其逝也雖有莫彰豈可獨非於往
時而皆是於茲日故亦庶僚苟順難觸龍鱗者歟所以虛
己外求披衷內省言而不用朕所甘心用而不言誰之責
也自斯已後各悉乃誠若有是非直言無隱

封禪詔

門下朕聞天大地大首播黎元媯皇燧皇肇恭元籙是知
施生爲德處崇高而不言亭毒攸資委欽明以司契洎乎
三正迭建五運相遷休烈存乎典墳至道流乎雅頌厯茲
十代咸宅九州逖聽風聲抑可知矣其有仰齊七政俯會
百神察靈眷於祥符報元功於昭告莫不罄情梁岱繼踵
云亭對越兩儀盡先聖之能事揚蕤三統垂曩哲之尊名
懸鏡天衢罔不繇於此也自中陽絕紐堙白水於窮流宮
孽紹興阻黃星於天塹永嘉東播化金馬以爲牛道武南

徂飛蒼鵝以登祚周吞嶽裔逮三葉而巢傾隋并舜後及
二帝而舟覆莫不以凶易亂譬畏迹而橫奔以暴代昏同
抱薪而止燎咸資攸斁之道冀及淳化之源各肆巨壑之
心規享上靈之佑却行求進其可得乎繇是寂寥千祀無
懷之風不嗣泯棄七經子長之言殆絕遂使成山日觀久
闕升中之儀汶上明堂疇聞類帝之義顧瞻禮樂深有可
嗟朕幼踐危機愍斯窮運上同附翼下靡息肩化感天狼
虔劉帝寓鴻波蕩岳溺橫流而罔訴大浸稽天墊重昏而
莫拯惴惴黔夏各垂餌於鯨鯢籍籍僵屍並糜肌於猘窟

上靈慈惻爰啟朕心景命潛通秉其仁育之性陰符煥發
導以戡翦之功於是負荷休徵援旗鞠旅肅恭儲祉吟雲
躍鱗順朱鳥以行誅騫丹鳳而遐舉射九鳥而懸日月區
品物以煦陽和練五石以造乾坤濟厥角以全眉壽於是
尊奉先帝凝旒於廟堂躬履兵鋒憂勤於變輔旣而仰逼
威命俯順樂推越自唐侯言膺下武深惟憂責之重自勗
若厲之懷遂致靈貺無涯翦旒頭而降錫遊魂削衽盡窮
髮以開疆東苑蟠桃西池昧谷咸覃正朔並充和氣較凝
旒於往代窮今古而罕聞考光宅於前皇罄油紉而莫覩

方今六合之表擊壤傳聲四海之隅菑畲歲稔食氣者靡
乖其性稟命者相賀其生豈朕眇身勤勞所逮諒繇高明
垂鑒祚此隆平今茲三事大夫百僚庶尹各述天人之意
請躡封禪之蹤顧惟寡薄推而不有杜絕羣言至於數四
中外之情尤切企佇之望逾深朕又詳思荷財成於穹昊
自古賢哲並歸功於大帝迫斯至理弗獲固辭展禮上元
實增慙懼可以貞觀二十有二載仲春之月式遵故實有
事於太山諸內外臣僚岳牧卿士旣相敦喻將事告成各
罄乃心無虧政道恪居所職務協時邕所司宜與縉紳先

生載筆圓冠之士詳求通典裁其折中深加嚴敬稱朕意
焉其今年朝集使宜集洛陽宮應朝集依十五年三月八
日勅諸王並聽來朝其北蕃自磧以南大首領赴會仍令
天下諸州明揚仄陋其有學藝優洽文蔚翰林政術甄明
才膺國器者並宜知日申送限以來年二月一日總集太
山庶令作賦擲金不韞天庭之綵被褐懷玉無溺屠釣之
閒務得英奇當加不次主者施行

左邱明等二十一人配享孔子廟詔

左邱明卜子夏公羊高穀梁赤伏勝高堂生戴聖毛萇孔

安國劉向鄭衆杜子春馬融盧植鄭元服虔何休王肅王弼杜元凱范甯等二十有一人並用其書垂於國胄旣行其道理合褒崇自今有事太學可與顏子俱配享孔子廟堂

贖取陷沒蕃內人口詔

隋末喪亂邊疆多被抄掠今鐵勒並歸朝化如聞中國之人先陷在蕃內者流涕南望企踵思歸朕聞之惕然深用惻隱宜遣使往燕然等州知見在沒落人數與都督相計將物往贖遠給程糧送還桑梓其室韋烏羅護靺鞨等三

部被延陀抄失家口者亦令爲其贖取

建玉華宮手詔

朕聞上代無爲簷茅而砌土中季華用祀玉而臺瓊燥濕
之致雖同奢儉之情則異朕承皇王之緒執造化之綱包
萬類於心端圖八紘於目際夷夏一軌區宇大同雖則德
有劣於難名道方參於至義若乃制服垂裳之后服牛羈
馬之君弦弧剡矢之奇運車浮舟之制濟時爲美功亦大
焉至若浩浩九齡爰爰七載融山坼地滔天襄陵生人之
艱勞亦極矣彼數德者功莫高乎吞狄此兩災者勞又甚

乎裁官今雖菲食卑宮有慙於曩哲安人濟難不慙於前
賢然而人皆輕見重聞貴耳賤目德雖微也以其古而爲
大功雖巨也以其今而成小不亦謬哉每流鑑於前經嘗
披懷而自勗思所以收驕閑逸卷慾除華而頃年已來憂
勞頓結暨至茲歲風疾彌時嗟乎濟世之威患攢躬而靡
制迴天之力痛沈已而難移重以景熾流金風揚溽暑遭
迴几席旭暮增勞俯仰巖廊寢興添弊雖冀廓景延涼蕩
茲虛憒近因羣下之志南營翠微本絕丹青之工纔假林
泉之勢峯居隘乎蚊睫山逕險乎焦原雖一己之可娛念

百僚之有倦所以載懷爽塏爰制玉華故遵意於樸淳本
無情於壯麗尺版尺築皆悉折庸寸作寸功故非虛役猶
恐遐邇乖聽方輿怨咨非其樂勞人而竭力好峻宇而雕
牆但以養性全生不獨在私在己怡神祈壽良以爲國爲
人比者屢有征行非無疲頓前歲問罪遼左去秋巡幸靈
州皆以翦害除凶懷柔服叛豈欲矜轍迹騁盤遊而已哉
今復土木頻興營繕屢動永言思此深念人勞一則以爲
慚一則以爲愧何則匈奴爲患自古弊之十月防秋人血
丹於水脈千里轉戰漢骨皓於塞垣當此之疲人不堪命

尚興未央之役猶起甘泉之功今則毳幙穹廬取爲郡縣
天山瀚海分爲苑池去已往之長勞成將來之永逸譬迴
一年力役創此新宮想志士哲人不以爲言也布告黎庶
明此意焉

停封禪詔

門下朕聞探元蹟者先實而後賓體至公者本仁而末禮
名歸於已往哲存而弗務德利於人前聖徇而爲急是用
範圍天地權輕重以會時宜取則陰陽適通變以從衆欲
繇是古之封禪無奪事機所謂奉天咸資務隙朕仰窺前

志歷選哲王無懷有巢緇逾繩契之表龜文鳳紀越在俎
豆之先扣寂寞以傳疑故可略而言也至如三元立統百
物正名步驟之軌非遙損益之源可挹雖堯心廣運局疆
域於流沙禹跡遐宣限要荒於碣石猶且先宏即敘次展
玉帛之儀首創賓門方備云亭之典告成之義罔弗繇茲
況朕奄有方輿閩域該於千古仰承靈睭降福超於百王
巨海所環莫非臣妾長河攸括並入封疆日者夷夏同文
貞符狎至謂可鳴鑾日觀勒牒仙閣許以來春親行告禪
而今延陀一姓流竄西陲控弦萬計初歸正朔亡其沙塞

之地游魂戴斗之鄉一物之微猶驚心於夕惕九夷乃陋
豈忘懷於施生新就繫維理須安置又以朕往歲躬勤拯
溺至於炎月浴比不安公卿庶僚各陳誠請遂有翠微之
役非無版築之勞旣而山谷阻深朝宗有礙重披丹懇請
建玉華朕以寸心經綸億兆冒茲隆熱貽朝野之深憂允
乃誠忱副率土之僉望遂復頻有興造恐致勞煩兼聞河
北數州頗傷淹滯朕爲人父母思濟黎元順動外中理無
兼遂其介邱大禮宜且權停前追諸王及四方岳牧并蠻
夷酋長令以明年二月會泰山者今並宜停其朝集使及

選舉人等前令詣洛陽宮可依常年集限並赴京師諸爲
封禪事舉人營造轉運等亦宜並詔停其玉華宮所立制
度前已下詔務從菲薄今乃庶事減省更令卑陋示免風
雨稱朕意焉可分道馳驛散頒天下主者施行

伐龜茲詔

皇天理物蓄嚴屬於積陰大塊厚生騰殺氣於秋序故霆
霓震曜聲懾八紘繁霜凝肅威加萬類朕旣承茲介福超
上皇王憂責在躬情兼列代昆蟲不理猶且納隍戎羯未
寧豈宜安席過矣西土自古遊魂昔與北場本同根蒂乘

戎致閱遂爾攜離鷄田戴斗是其祭天之地鴈塞干雲上
應分術之野疆逾瀚海局距塞垣總其銜燭之鄉並爲征
賦之俗惟有烏孫舊境置罟所漏本旣先拔末豈能全皮
尚不存毛將安附侵軼旅獒之壤剽掠巨雀之藩播此凶
荒厯年茲久積其愆禍崇凶貫盈凡厥瓊裘不勝焦爛蠹
茲板屋盡苦侵漁膜拜錦車思拯溺以延首重譯蠻貊叫
嚴闔而委命裂裳裹足驟請天誅朕乃睠西顧深悼於懷
捨此弗圖孰祗靈命是以求衣待旦對懸亡食哀彼綴旒
義增投袂雖臨軒而獨對慮疑謀之罔從乃命鼎司陰籌

遠略言纔出於脣吻應已昭於上元昧旦臨朝太史奏曰
昨宵甲夜纖阿蝕昴考靈臺之祕簡徵渾象之舊文月者
陰精用刑之兆也星躔胡分數終之效焉是知天道雖高
去人非遠至誠仰達應不踰時奉以恭行理當無惑今便
躬行推轂制詔夏官禡社出車發明秋令殲斯巨猾救彼
蒼黎可遣使持節崑邱道行軍大總管左驍衛大將軍阿
史那社爾副大總管左驍衛大將軍契苾何力金紫光祿
大夫行安西都護郭孝恪司農卿清河郡公楊宏禮行軍
總管左武衛將軍李海崖等總挈黿斬蛟之士帥曳牛佩

豕之曹莫不感義長驅誓探巢穴之志循躬距躍將謝肉
骨之恩又發鐵勒兵牧十有三部突厥侯王十餘萬騎沸
湧動沙場之地呼吸振廣漠之風道自金微會於葱嶺又
遣吐蕃君長踰元菟而北臨步搖酋渠絕昌海而西驚齊
飛白羽周設天羅鏐金懸米之源掩河津而電擊沫赭崦
山之嶠驅日域以雷奔取彼渠魁委於司寇拯其萌隸賜
以營魂俾夫六羸泛駕免覆車而伏阜十角摧鋒與共觝
而俱獻豈非有名動衆本爲除殘以義出師貴能懲惡是
以倒戈必宥事表於前經輿櫬不誅理昭於往誥其有去

危投款悔禍求哀。毳幙酋豪宜錫長纓之寵。韋韝種落惠以飲喙之娛。且夫察微興事者機也。勞已安人者義也。天與則取可謂乘機。衆欲斯從是名敦義踐機而必作戴義以行之。今此一勞永康四表。折兵難再。或失時宜以朕之懷速頒天下。

賜高士廉陪葬詔

昔平仲云亡齊后深股肱之慟。太真旣沒晉君悲社稷之臣。故悼往飾終義存追遠。褒忠錄舊事本因心。故開府儀同三司上柱國申國公士廉德範宏深風猷遠著道高廊

廟望重勲賢職在銓衡穆九流而馳譽位居端右總百揆而騰芳班職台儀具瞻允集忠謀令範遇物必彰造膝危詞類多宏益瞻風力以齊軌軼伊呂而長驚朕爰在弱齡早敦姻戚綢繆眷遇多厯年所方期翊茲景化永贊隆平曾不憊遺忠良奄及感惟永往震動厥心儀形莫追徽音日遠宜崇禮命式表哀榮可贈司徒使持節都督并汾箕嵐四州諸軍事并州刺史給班劔四十人及羽葆鼓吹賻絹布二千段米粟二千石陪葬昭陵令攝鴻臚卿監護

玉華宮成曲赦宜君縣詔

昔周武應天尅瑤臺而靡處漢高作極獲葢陽而不居散
服桃林革命先於卜雒旣遷粉社創制肇於䟽龍朕御九
成有乖斯義以茲撫事尤須改作何者文營仁壽概日臨
雲煬起乾陽銜珠帶璧比阿房而競爽猶且有加擬傾宮
而騁麗全爲具體隋德云謝其徵在茲朕悼於懷爲日旣
久故違其侈義顯茲令辰加以心懷濟育事切於肌膚亟
犯風霜疾纏於腠理每至隆曦屆序大火摘芒雖對寒泉
如升頭痛之坂式居珍簟若涉炎火之林繇是岳牧憂惶
公卿駭懼累陳丹懇請建山宮厯載旣深竊愛百金之費

詳其至理宜順萬姓之心朕往冒兵凶爲黔首而忘己今
茲清暑豈勞人而取安但以上奉宗祧下寧兆庶身非己
有不可自輕敬思休攝之方兼履古先之道發明二指創
此一宮即澗䟽隍憑巖構宇土無文績木不雕鏤矯金鋪
以荆扉變綺牕於甕牖負宸協幽貞之賞垂續嘉遁世之
情振此沖規方垂帝範今旣成之不日賴洽普天宜順發
生宏茲霈澤可曲赦宜君縣官及百姓并督作官人丁匠
等大辟罪已下常赦所不免者不在赦例其營造監當官
人量加品秩及衛士以上並節級賜物先在宮苑內住移

出外者給復三年

賜蕭瑀陪葬詔

悼往飾終實惟茂典高班縉禮允屬名臣故特進宋國公
瑀稟粹挺生含章秀出慶傳積德道映搢紳登朝膺務多
厯年所出綜機揆雅道光於廊廟入司綸綍讜言聞於帷
展行歸恭儉志存靜退輔德無閒逝川奄及緬惟既往震
悼良深宜錫寵章式光幽宥可贈司空使持節都督荆峽
岳朗澧五州諸軍事荊州刺史官封如故陪葬獻陵宜令
使人持節冊命贈絹布五百段并賜東園祕器

賜房元齡陪葬詔

輟膳流哀悲深棟幹徹懸興感悼切股肱是知縉禮飾終
道先彝冊贈章追遠事本因心故司空梁國公元齡蹈義
挺生資忠秀出功宣翼贊誠著艱難推轂代藩參六飛之
馭沃心皇極均十亂之重恪居端揆亟積暄寒九功繇其
日用百辟於焉仰止若乃恭儉周慎之心奉國忘私之志
足以抗衡上列獨暎終古方申倚寄永贊隆平曾不憊遺
摧梁奄及永惟良輔是用震慟於厥心宜加寵靈式旌泉
路可贈太尉使持節都督并箕嵐勝四州諸軍事守并州

刺史所司備禮冊命給班劔四十人及羽葆鼓吹賻絹布二千段米粟二千石陪葬昭陵賜東園祕器仍令工部尚書閤立德攝鴻臚卿監護

諸州寺度僧詔

昔隋季失御天下分崩四海塗炭八埏鼎沸朕屬當戡亂躬履兵鋒亟犯風霜宿於馬上比加藥餌猶未痊除近日已來方就平復豈非福善所感而致此休徵耶京城及天下諸州寺宜各度五人宏福寺宜度五十人

答長孫無忌請誅段志沖手詔

朕聞以德下人者昌以貴高人者亡是以五岳凌霄四海
亘地納汙藏疾無損高深志沖欲以匹夫解位天子朕若
有罪是其直也若當無罪是其狂也譬尺霧障天不虧於
大寸雲遮日何損於明今卿等皆欲致以極刑意所不忍
可更詳議任流遠方

降雍州見禁囚徒詔

皇太子治業隆三善道兼四學惟忠孝是資寬仁在慮興
言獄犴每切於懷以春陽方動請行寬宥惻隱之辭屢聞
旒展宜順其所請曲流恩降雍州長安萬年兩縣及諸司

見禁囚徒三年已下差降杖罪並放免徒罪已上徵銅未輸者亦從降例

甘雨降大赦詔

昔興殷解網動嘉惠於生靈惟堯肆赦播深仁於四海撫名嶽登甘泉䟽長河捐儀鳳惟皇祚惠此爲常範朕夏越前古祇膺寶位雖復十角之寇久變衣冠而乃三韓之野尚興車甲言念艱勤無忘鑒寐兼以去冬無雪獻歲愆陽陳尊俎於四衢免租田於百郡昔成湯七載始聞兢惕朕今三月實懼於懷是以政令除殘商羊繼舞昭回停詠纖

阿衡畢密雨高飛傾河驟瀉至誠無爽天意非遥宣布寰瀛同滋愷澤可大赦天下大辟罪已下無輕重咸赦常赦所不免者不在赦限其有亡官失爵宜量收敘八十已上各賜粟帛鰥寡惸獨及篤疾者量加賑貸

賜李靖陪葬詔

昔晉羊公云逝名都爲之罷市鄭子產斯亡在機於焉投杼故開府儀同三司上柱國衛國公李靖蘭畹騰芳釣川揚佐氣凌關外志溢戎場興言締構十角將三吳咸偃披勲王府閩禺與渾塞同揮澄妖氛於下瀨闡皇猷於高門

舟楫遐宣台儀近曜官稱載靜休有餘芳蘊茲高志歸乎
樂善遊赤松於艾服之年訪黃綺於杖鄉之歲語默之趣
儔今罕匹進退之道對古爲朋逝川東馳高春西靡眷言
永往情深哀悼昔帷堂始事荀公有追贈之文郊平旣窆
祭遵致容車之禮式旌泉壤以備哀榮可贈司徒使持節
都督并汾冀嵐四州諸軍事所司備禮冊命給班劔四十
人及羽葆鼓吹陪葬昭陵賜東園祕器仍令攝鴻臚寺卿
享監護羽儀送至墓所

宣慰劔南將士詔

吐蕃醜類背約孤恩卿等同嫉寇讎爲國展效深入賊境
久冒艱危至於勤勞豈不知委頃聞在彼小有喪敗卿等
非不盡力自是主將無謀古之用兵在於責帥王昱緣此
亦已貶官卿等但須悉心不可因茲阻氣遞相激勵以保
功名戰亡之人深可憫惜並申弔祭用慰幽魂其病醫及
陣亡之家宜委陳繇與州縣相知優恤

欽定全唐文卷九目錄

太宗 六

勞鄧州刺史陳君賓詔

謹死刑詔

冊蘇亶女爲皇太子妃詔

冊荊州都督荆王元景詔

爲故禮部尚書虞世南齋僧詔

獎魏徵編注戴氏禮詔

答魏徵謝賜殿材起堂詔

問魏徵病手詔

答魏徵上羣書理要手詔

重問魏徵病手詔

答魏徵辭太子太師詔

答房元齡請解僕射詔

又答房元齡詔

捨舊宅造興聖寺詔

賜竇誕還第詔

幸遼東賜褚亮詔

令諸州寺觀轉經行道詔

賜涼州都督李大亮詔

賜李大亮荀悅漢紀詔

答有司請討林邑詔

遺詔

令虞世南製杜如晦碑手勅

定樂勅

命魏王泰祭尚書虞世南手勅

佛遺教經施行勅

答元奘謝御製三藏序勅

斷賣佛像勅

答羣臣封禪表勅

手勅

冊楊恭道女爲婕妤文

冊崔宏道女爲才人文

冊蕭銍女爲才人文

冊蕭鐸女爲美人文

冊晉王爲皇太子文

冊徐州都督徐王元禮文

冊越王泰改封魏王文

冊蘇亶長女爲皇太子妃文

冊韋挺長女爲齊王妃文

冊劉威德次女爲虢王妃文

冊齊國公無忌爲司空文

冊高士廉改封申國公文

冊李勣改封英國公文

冊程知節改封盧國公文

冊侯君集改封陳國公文

冊段志元改封襄國公文

冊突厥李思摩爲可汗文

陳讓禪位表

欽定全唐文卷九

太宗 六

勞鄧州刺史陳君賓詔

朕以隋末亂離毒被海內率土百姓零落殆盡州里蕭條
十不存一寤寐思之心焉若疫是以日昃忘食未明求衣
曉夜孜孜惟以安養爲慮每見水旱降災霜雹失所撫躬
責己自慚德薄恐貧乏之黎庶不免飢餒傾竭倉廩普加
賑恤其有一人絕食若朕奪之分命庶僚盡心營救去年
關內六州及蒲虞陝鼎等復遭亢旱禾稼不登糧儲旣少

遂令分房就食比聞刺史以下及百姓等並識朕懷逐糧
戶到遞相安養回還之日各有贏糧乃別齎布帛以申贈
遺如此用意嘉嘆良深一則知水旱無常彼此遞相拯贍
不慮凶年二則知禮讓興行輕財重義四海士庶皆爲兄
弟變澆薄之風敦仁慈之俗政化如此朕復何憂其安置
客口官人支配得所並令考司錄爲功最養戶百姓不悵
財帛已勅主者免今年調物宜知此意善相勸勉

謹死刑詔

比來有司斷獄多據律文雖情在可矜而不敢違法守文

定罪或恐有冤自今門下省視有據法當死而情在可矜者錄狀奏聞

冊蘇亶女爲皇太子妃詔

配德元良必俟邦媛作儷儲貳允歸冠族祕書丞蘇亶長女門襲軒冕家傳義方柔順表質幽閒成性訓彰圖史譽流邦國正位儲闈寔惟朝典可皇太子妃所司備禮冊命主者施行

冊荊州都督荆王元景詔

夫建官之道實資明德列爵之義必俟茂親故晉鄭佐周

功宣於寅亮間平輔漢業崇於藩屏惟爾業尚忠肅器懷
恭懿幼稟庭訓早膺朝寵仁恕聞於封畿廉平著於方策
荆衡作鎮江漢爲紀包括巴濮之域跨躡吳越之郊褰帷
永諧分珪僉屬是用備茲令典錫以休命奄有楚甸代爲
唐輔可不慎歟

爲故禮部尚書虞世南齋僧詔

故禮部尚書文懿公虞世南德行純備文爲辭宗夙夜盡
心志存忠益奄從物化忽移時序昨因夜夢倏覩斯人兼
進讜言有若平生之日追懷遺美良用悲悼宜資冥福申

朕思舊之情可即其家齋五百僧造佛像一軀

獎魏徵編注戴氏禮詔

禮經殘缺其來已久漢代戴聖爰記舊聞古今所宗條目
雜亂先儒傳授多厯年所咸事因循莫能釐正特進鄭國
公徵文高翰林學綜冊府服膺典禮有志討論乃依聖所
記更事編錄以類相從別爲篇第并更注解文義粲然遂
得先聖微言因茲重闡後之學者多有宏益宜付祕書

答魏徵謝賜殿材起堂詔

觀卿書不如尋常憂惋之情切朕懷意處卿至此堂爲宏

金定三卷之三
濟黎元經圖達化耳豈爲朕一人而已何事果來相謝

問魏徵病手詔

不見數日憂憤甚深自顧過已多矣言已失矣行已虧矣
古人云無鏡無以鑑鬚眉可謂實也比欲自往恐勞卿所
以使人來去若有聞知此後可以信來具報

答魏徵上羣書理要手詔

朕少尚威武不精學業先王之道茫若涉海覽所撰書博
而且要見所未見聞所未聞使朕致治稽古臨事不惑其
爲勞也不亦大哉

重問魏徵病手詔

近來疹病何似漸得可未卿患日久言面已賒理國立家
方知難耳比日自爲勞思委頓始驗任人則逸自任則勞
非虛言也此懷公想知之可以意得書何盡心略而言耳

答魏徵辭太子太師詔

漢之太子四皓爲助我之賴公即其義也知公疾病可臥
護之

答房元齡請解僕射詔

夫選賢之義無私爲本奉上之道當仁是貴列代所以宏

風通賢所以叶力卿忠肅恭懿明允篤誠草昧霸圖綢繆
帝道儀刑禮閣庶政惟和輔翼春宮望實斯在而忘彼大
體徇茲小節雖恭教諭之職乃辭機衡之務豈所謂弼余
一人共安四海者也宜聽此懷無煩固讓

又答房元齡詔

元齡德爲時秀位隆朝右業履恭儉志懷沖退頻表陳誠
固辭執法朕旻食思治虛已欽賢方資啟沃共康兆庶豈
得申其雅尚用虧彝典便可斷表即令攝職

捨舊宅造興聖寺詔

丹陵啟聖華渚降祥叶德神居克隆鴻業朕丕承大寶奄
宅域中遠藉郊禋之慶仰惟樞電之祉思園之禮旣宏撫
鏡之情徒切而永懷慈訓欲報無從靜言因果思憑冥福
通義宮皇家舊宅制度宏敞以崇神祠敬增靈祐宜捨爲
尼寺仍以興聖爲名庶神道無方微伸凱風之思主者施
行

賜竇誕還第詔

朕聞爲官擇人者治爲人擇官者亂竇誕比來精神衰耗
異常時知不肖而任之覩尸祿而不退非唯傷風亂政亦

金史卷之二十一
三
恐爲君不明考績黜陟古今常典誕可光祿大夫還第

幸遼東賜褚亮詔

昔年師旅卿常入幕今茲遐伐君已懸車儵忽之間移三十載眷言疇昔我勞如何今將遂良東行想公於朕不惜一兒於膝下耳故遣陳離意善居加食

令諸州寺觀轉經行道詔

神道設教慈惠爲先元化潛通亭育資始朕恭膺大寶撫愛黎元矜愍之心觸類而長是用旁求冥貺幽贊明靈所冀九功惟敘五福斯應比嚴霜早降秋實不登靜言寡薄

無忘慚惕今百穀滋茂萬寶將成猶恐風雨失時字養無
寄敢藉聖明介茲多祉宜爲普天億兆仰祈嘉祐可於京
城及天下諸州寺觀僧尼道士等七日七夜轉經行道每
年正月七月例皆準此

賜涼州都督李大亮詔

以卿兼資文武志懷貞確故委藩牧當茲重寄比在州鎮
聲績遠彰念此忠勤無忘寤寐使遣獻鷹遂不曲順論今
引古遠獻直言披露腹心非常懇到覽用嘉歎不能已已
有臣若此朕復何憂宜守此誠始終若一詩云靖共爾位

好是正直神之聽之介爾景福古人稱一言之重侔於千金卿之此言深足貴矣今賜卿金壺瓶金盃各一枚雖無千鎰之重是朕自用之物

賜李大亮荀悅漢紀詔

卿立志方直竭節至公處職當官每副所委方大任使以申重寄公事之間宜觀典籍賜卿荀悅漢紀一部此書敘致簡要論議深博極爲政之體盡君臣之義今以賜卿宜加尋閱

答有司請討林邑詔

兵者凶器不得已而用之故漢光武云每一發兵不覺頭
鬚爲白自古以來窮兵極武未有不亡者也苻堅自恃兵
強欲必吞晉室興兵百萬一舉而亡隋主亦欲必取高麗
頻年勞役人不勝怨死於匹夫之手至如頡利往歲數來
侵我國家部落疲於征役遂至滅亡朕今見此豈得輒即
發兵但經歷山險土多瘴癘若我兵士疾疫雖克翦此蠻
亦何所補言語之間何足介意

遺詔

夫天命之重祿錯奉其圖書天子之尊赤縣先其司牧而

功兼造化橋山之樹已陰業致昇平蒼梧之駕方遠至於
平寇亂安黎元灑洪災攘大患黃帝之五十三戰商湯之
二十七征以此申威曾何足算昔者亂階斯永禍鍾隋季
罄宇凝氛曠昏辰象縣區作梗搖蕩江河朕拂衣於舞象
之年抽劒於斬蛇之地雖復妖干王莽戮首輓車凶百蚩
尤釁尸軍鼓垂文暢於炎野餘勇澄於斗極前王不闢之
土悉請衣冠前史不載之鄉並爲州縣再維地軸更張乾
絡禮義溢於寰瀛菽粟同於水火破舟船於靈沼收干戈
於武庫辛李衛霍之將咸分土宇縉紳廊廟之材共垂帶

綬至於比屋黎元關河遺老或羸金帛或齎倉儲朕於天下士大夫可謂無負矣朕於天下蒼生可謂安養矣自櫛風沐雨遂成弭沴憂勞庶政更起沈疴況乃漢苦周勤禹脩堯腊以矜百姓之所致也道存物往人理同歸掩乎元泉夫亦何恨矣皇太子治大孝通神自天生德累經監撫熟達機務凡厥百僚羣公卿士送往事居無違朕意屬續之後七日便殯宗社存焉不可無主皇太子即於柩前即皇帝位依周漢舊制軍國大事不可停闕尋常閒務任之有司文武官人三品已上並三日朝晡哭臨十五舉音事

畢便出四品已下臨於朝堂其殿中當臨者非朝夕臨無得擅哭諸王爲都督刺史任者並來奔喪濮王萊王不在來限其方鎮岳牧在任官人各於任所舉哀三日其服紀輕重宜依漢制以日易月園陵制度務從儉約昔者霸陵不掘則朕意焉遼東行事並停太原元從人見在者各賜勲官一級諸營作土木之功並宜停斷

令虞世南製杜如晦碑手勅

吾與如晦君臣義重不幸物化追念勲舊痛悼於懷卿體吾此意爲之製碑文也

定樂勅

殷薦祖考以崇功德比雖加以誠潔而廟樂未稱宜令所司詳諸故實制定奏聞

命魏王泰祭尚書虞世南手勅

虞世南與我猶一體也拾遺補過無日暫忘當代名臣人倫準的吾有小失必犯顏而諍之今其云亡石渠東觀之中無復人矣痛惜豈可言耶

佛遺教經施行勅

往者如來滅後以末代澆浮付囑國王大臣護持佛法然

僧尼出家戒行須備若縱情淫佚觸塗煩惱關涉人間動
違經律既失如來元妙之旨又虧國王受付之義遺教經
者是佛臨涅槃所說誠勸弟子甚爲詳要末俗縉素並不
崇奉大道將隱微言且絕永懷聖教用思宏闡宜令所司
差書手十人多寫經本務在施行所須紙筆墨等有司準
給其官宦五品已上及諸州刺史各付一卷若見僧尼行
業與經文不同宜公私勸勉必使遵行

答元奘謝御製三藏序勅

朕才謝珪璋言慙博達至於內典尤所未閑昨製序文深

爲鄙拙唯恐穢翰墨於金簡標瓦礫於珠林忽得來書謬承褒讚循躬省慮彌益厚顏善不足稱空勞致謝

斷賣佛像勅

佛道形像事極尊嚴伎巧之家多有造鑄供養之人競來買購品藻工拙揣量輕重買者不計因果止求賤得賣者本希利潤唯在價高罪累特深福報俱盡違犯經教並宜禁約自今已後工匠皆不得預造佛道形像賣鬻其見成之像亦不得銷除各令分送寺觀令寺觀徒衆酬其價直仍仰所在州縣官司檢校勅到後十日內使盡

答羣臣封禪表勅

卿輩皆以封禪爲帝王盛事朕意不然若天下乂安家給人足雖不封禪庸何傷乎昔秦始皇封禪而漢文帝不封禪後世豈以文帝不及始皇耶且事天掃地而祭何必登泰山之巔封數尺之土然後以展其誠敬乎

手勅

晚來腫勢漸歇肉色如故體中亦自勝常昨日恐卿等爲憂略此相報勅

冊楊恭道女爲婕妤文

維貞觀某年月日皇帝遣使某官某持節冊命曰於戲惟爾前魏王府諮議參軍楊恭道第三女門襲鍾鼎訓彰禮則幽閒表質柔順爲心備職後庭寔惟通典是用命爾爲婕妤往欽哉其光膺徽命可不慎歟

冊崔宏道女爲才人文

維貞觀某年月日皇帝使某官某副使某官某持節冊命曰於戲惟爾兼徐州都督府司馬崔宏道長女門稱著姓訓有義方婉順爲質柔明表行宜外後庭備茲內職是用命爾爲才人往欽哉其光膺徽命可不慎歟

冊蕭鏗女爲才人文

維貞觀年月日云云於戲惟蕭鏗第二女幼習禮訓夙表
幽閒胄出鼎族譽聞華閭宜遵舊章授以內職是用命爾
爲才人往欽哉其光膺徽命可不慎歟

冊蕭鏘女爲美人文

維貞觀年月日云云於戲蕭鏘第二女稟訓冠族著美家
聲習禮流譽鏡圖有則宜升後庭允茲令典是用命爾爲
美人往欽哉其光膺徽命可不慎歟

冊晉王爲皇太子文

維貞觀十七年歲次甲辰四月某朔日皇帝若曰於戲惟爾并州都督右武侯大將軍晉王治忠肅恭懿宣慈惠和仁孝出於自然信義備於成德禎祥夙著睿哲日新永言少陽七鬯是寄疇咨朝列卿士協從是用命爾爲皇太子往欽哉爾其思王道之艱難遵聖人之炯戒勤修六德勉行三善無或舉非法度忘恭儉而好驕奢無或理乖彝倫遠忠良而近邪佞非履道無以彰名非任賢無以成德爾身爲善國家以安爾身爲惡天下以殆睦九族而禮庶僚懷萬邦而憂遐裔兢兢業業無怠無荒克念爾祖宗以寧

我宗社可不慎歟

冊徐州都督徐王元禮文

於戲惟王建都惟聖垂範安兆民者實敦親戚固鴻業者
必樹藩衛惟爾使持節都督徐譙泗三州諸軍事徐州刺
史徐王元禮器能明敏業履詳和幼聞詩禮早膺車服海
岱及淮俗兼齊魯胙土按部僉曰爾諧是用斟酌前代率
由令典俾屏廼辟傳爾後昆朕聞曰友于兄弟施于有政
弗學牆面莅事惟煩緬求大訓茲爲要道往欽哉爾其執
心於忠孝踐行於儉約無好逸豫以犯非禮無縱嗜慾以

邇宵人明率舊章以保疆土可不慎歟

冊越王泰改封魏王文

維貞觀某年某月某日甲子皇帝若曰於戲在昔哲后受命君臨並建茂親以爲藩衛然則古之列國今之按部循名或異立政實同皆所以共治黎元俱獎王室克隆鼎祚咸悉由之惟爾雍州牧左武侯大將軍越王泰生而韶敏幼而好學樂善不倦才藝日新地則維城禮優分器惟彼三魏實號五都非親勿居夾輔攸屬是用命爾爲使持節都督相衛黎魏洛邢貝七州諸軍事相州刺史改封魏王

傳之子孫長爲藩翰古人有言皇天無親惟德是輔民心
無常惟惠之懷往欽哉爾其鑒此格言無自驕奢無邇邪
佞兢兢業業以保爾茅土可不慎歟

冊蘇亶長女爲皇太子妃文

惟爾祕書丞蘇亶長女族茂冠冕慶成禮訓貞順自然言
容有則作合春宮實協三善曰嬪守器式昌萬葉備茲令
典抑惟國章是用命爾爲皇太子妃往欽哉其光膺徽命
可不慎歟

冊韋挺長女爲齊王妃文

維貞觀年月日冊命曰於戲惟爾兼太常卿扶風郡開國男韋挺長女地胄高華質性柔順訓彰禮教譽表幽閑作儷藩閭實惟朝典是用命爾爲齊王妃往欽哉

冊劉威德次女爲號王妃文

維貞觀年月日皇帝遣使持節冊命曰於戲惟爾刑部尚書彭城縣開國公劉威德第二女地胄清華志懷婉順訓彰圖史譽聞邦國式遵典禮作儷大藩是用命爾爲號王妃往欽哉其光膺徽命可不慎歟

冊齊國公無忌爲司空文

維貞觀某年月日甲子皇帝若曰於戲開府儀同三司齊國公無忌設官分職允代天工致治興邦實資台輔永覽前哲咸在得人故能成寅亮之功宏變理之業惟爾識宇冲邈風範光照才稱棟幹器惟瑚璉協贊皇基克隆鼎業譬彼舟楫同茲魚水任重禮闈則璣衡以穆位班職袞則風雨不愆固已同軌前烈齊聲往彥襲德美功有國常典經邦論道僉曰爾諧是用命爾爲司空往欽哉其光榮寵命可不慎歟

冊高士廉改封申國公文

維貞觀某年月日甲子皇帝若曰於戲昔周建五等漢班
六條經邦之制既宏載祀之祚惟永是以樊侯申伯功成
藩翰喬卿叔節績宣刺舉惟爾特進吏部尚書許國公高
士廉識宇宏正風鑑秀激地惟姻戚才稱棟幹雲雷在運
參霸圖於艱難龜鼎有歸奉王猷於獻替廊廟推重縉紳
佇德總方牧之寄勝殘播美綜銓衡之職得人流詠固已
聲高多士功書太常桐柏作鎮長淮設險形勝之地允屬
勲賢是用命爾爲使持節申州諸軍事申州刺史改封申
國公傳之子孫世爲唐輔往欽哉率循典禮勉固誠節垂

裕來葉以保黎庶可不慎歟

冊李勣改封英國公文

維貞觀某年月日甲子皇帝使某官持節冊命曰於戲列
爵者必俟茂勲設官者咸資懿德所以翼贊王室宏宣帝
載惟爾光祿大夫行并州大都督府長史太子左衛率曹
國公李勣識量恢宏風略閎遠忠以奉上信以立身獻款
西歸邙鄘風美分麾東略號鄭景從預艱難於藩邸參經
綸而方面南定維揚北清大漠威振殊俗勲書冊府及入
司禁旅出帥藩鎮勞動表於夙夜功用成於期月蘄黃之

地濱帶江淮鎮捍之重允屬功烈是用命爾爲使持節蘄州諸軍事蘄州刺史改封英國公任重六條地優五等爲朕藩屏傳爾子孫往欽哉其祗膺朝命克固臣節勤恤黎元垂裕後世可不慎歟

冊程知節改封盧國公文

維貞觀某年月日甲子皇帝使某官某副使某官某持節冊命曰於戲蓋宣條作牧胙土建侯共治長寄藩翰斯在惟爾左領軍大將軍檢校原州都督宿國公程知節志懷銳穎氣幹強果業預艱難效宣行陣入司禁衛勤誠著於

軒陛出鎮方隅惠化洽於黎俗疇庸有典式隆寵命是用
命爾爲使持節朗州諸軍事朗州刺史改封盧國公傳之
子孫長是藩屏往欽哉爾其戒典謨之訓固臣子之節勤
修政道以貽爾後可不慎歟

冊侯君集改封陳國公文

維貞觀某年月日甲子皇帝若曰於戲夫經邦之道必資
長策利建之義式固無窮是以周之列國祚世藩屏漢之
功臣永垂帶礪惟爾兵部尚書潞國公侯君集體業貞固
識量恢凱任切腹心寄深文武草昧伊始奉一匡於藩朝

光華在運典九伐於禮樂入陪禁中出臨閭外贊嘉謀於樽俎掃逋寇於遐荒誠量歲寒勲勒庸器宛邱之地實惟舊鎮胙土作牧允屬朝望是用命爾爲使持節陳州諸軍事陳州刺史改封陳國公傳之子孫世爲唐輔往欽哉爾其克固臣節思勗王度夙夜匪懈無替典則可不慎歟

冊段志元改封褒國公文

維貞觀某年月日甲子皇帝若曰於戲夫計功裂土量能分職所以光贊王室康乂黎元惟爾左驍衛大將軍樊國公段志元理懷沈毅氣幹強雄蜀漢委質早效忠款潁川

從我備盡心力預艱虞於藩朝陪戎征於閩外勤宣階陛
功表旌旗西城之地襟帶巴蜀藩翰之重實俟勲庸是用
命爾爲使持節金州諸軍事金州刺史改封襄國公傳之
子孫世爲藩輔往欽哉爾其勉固一心勗茲六行克勤政
術無斁彝典可不慎歟

冊突厥李思摩爲可汗文

於戲突厥部衆代居沙漠元戎纔舉龍城克定三部種類
十角酋渠咸襲冠帶俱爲臣妾朕光宅六合亭育萬品爰
降大造存其亡國旣復故庭乃樹君長惟爾右武侯大將

軍化州都督懷化郡王李思摩器量明遠識用宏通地稱
貴種望高賜姓忠孝之節簡於朕心明智之材重於蕃落
朕用是命爾爲乙彌泥孰俟利苾可汗傳之子孫爲唐藩
屏上鑒自古下觀近代守誠節者咸保其國人爲凶惡者
必及於覆敗往欽哉爾其鑒茲往事祇聽朕言奉國以丹
赤爲先御下以信義爲本勉正爾身勤恤爾衆無昵邪佞
無遠忠良無恣驕奢無趨貪暴兢兢業業以綏爾疆土可
不慎歟

陳讓禪位表

臣聞至敬無文至誠不飾地居臣子不以小忠撓志情兼家國不以細行嬰心臣蒙獎厲擢居天策戰必以死寔深愍於黎庶奮不顧命願無忝於宗社規摹指麾皆稟聖算人心神誘遂得成功安敢貪天自稱己力前以聖人大寶濫鍾愚懦臣謂肅成理務禮通監撫日慎一日不敢推辭今奉茲詔更垂獎予以四海乂安褰裳紫極歸尊軒轅天下幸甚臣自當啟誦不覺厚顏頃者陰陽尚愆嘉穀未稔政治有虧刑典不措恐眇身多罪以及萬方伏願天慈仍安太極待民知堯力玉燭順序網開湯祝金科削編然後

降輦西宮於事非晚付臣宣室亦敢當仁臣志在忘私冒

陳丹款